

سرى للغاية

محضر اجتماع مجلس الوزراء برئاسة الرئيس جمال عبد الناصر

القاهرة - قصر القبة فى ٢٢ سبتمبر ١٩٦٨

الحاضرون

الرئيس جمال عبد الناصر، حسين الشافعى.. نائب
الرئيس ووزير الأوقاف، الدكتور محمود فوزى..
مساعد رئيس الجمهورية للشئون الخارجية، صدقى
سليمان.. نائب الرئيس ووزير الكهرباء والسد
العالى، كمال رفعت.. للعمل، عزيز صدقى..
للصناعة والبتترول والثروة المعدنية، عبد المحسن
أبو النور.. للإدارة المحلية، ثروت عكاشة..
للثقافة، محمد أبو نصير.. للعدل، سيد مرعى..
للزراعة والإصلاح الزراعى، حسن عباس زكى..
للاقتصاد والتجارة الخارجية، عبد الوهاب البشرى..
للانتاج الحربى، محمد لبيب شقير.. للتعليم العالى،
محمود رياض.. للخارجية، شعراوى جمعة..
للاداخلية، أمين هويدى.. للدولة، محمد فائق..

للإرشاد القومى، كمال هنرى أبادير.. للمواصلات،
فريق أول محمد فوزى.. للحربية، محمد حلمى
مراد.. للتربية والتعليم، محمد عبد الله مرزبان..
للتأمين والتجارة الداخلية، إبراهيم زكى قناوى..
للرى، على زين العابدين صالح.. للنقل، أحمد
مصطفى أحمد.. للبحث العلمى، السيد جاب الله
السيد.. للتخطيط، حسن حسن مصطفى.. للإسكان
والمرافق، محمد بكر أحمد.. لاستصلاح الأراضى،
عبد العزيز محمد حجازى.. للخزانة، محمد حافظ
غانم.. للسياحة، محمد صفى الدين أبو العز..
للشباب، ضياء الدين داوود.. للشئون الاجتماعية
وللدولة لشئون مجلس الأمة، عبد العزيز كامل..
نائب وزير الأوقاف.

المحتويات

الصفحة

الموضوع

- ١ - مشاكل الإسكان فى السويس والإسماعيلية وبورسعيد
- ٥ - مشاكل مع ليبيا والسودان حول شركة التأمين المشتركة
- ٥ - سعر الأرز، ومناقشة تحسين الرغيف
- ١٠ - مناقشة سياسة التعليم والبحث العلمى
- ١٥ - بحث مدى تقدم تنفيذ الخطة الاقتصادية
- ٢٩ - عبد الناصر.. طلب مراجعة تنفيذ قرارات المؤتمر القومى وبيان ٣٠ مارس

قرارات مجلس الوزراء

فى ٢٢/٩/١٩٦٨

مشاركة السلطة التنفيذية بكل جهدها فى تنفيذ ما يخصها من مقررات وتوصيات المؤتمر القومى العام؛ باعتبار أن هذه المقررات والتوصيات خطوط ملزمة للعمل الحكومى، خصوصا بعد قول الرئيس جمال عبد الناصر فى نهاية الجلسة الختامية لدورة المؤتمر: من أنه يتعهد بأن يفعل كل ما فى وسعه لكى يضع قرارات المؤتمر وتوصياته موضع التنفيذ.

استعادة البحث ومواصلته والبت فى المسائل الكبرى التى كان مجلس الوزراء يبحثها قبل أن توقف اجتماعاته خلال شهرى يوليو وأغسطس؛ وفى مقدمتها تقرير اللجنة الخاصة بتنفيذ ما ورد فى بيان ٣٠ مارس، الى جانب تقرير اللجنة الخاصة التى بحثت موضوع الاصلاح الاقتصادى. وضع جدول أعمال محدد لمجلس الوزراء فى الجلسات القادمة؛ سواء مما ورد فى قرارات وتوصيات المؤتمر القومى، أو ما قد يرى الوزراء فى اختصاصاتهم إعطائه أولوية من الموضوعات الجارية.

بحث ثلاثة موضوعات محددة: تحسين الرغيف وضرورة العمل على رفع مستواه، أسس السياسة التعليمية فى مراحل التعليم المختلفة، استعراض عام لسير العمل فى خطة التنمية خلال الشهور الثلاثة الماضية، ومتابعة ما تم من مشروعات الخطة فى الفترة التى بدأت بالعمل بالميزانية الجديدة فى يوليو الماضى.

سرى للغاية

محضر اجتماع مجلس الوزراء برئاسة الرئيس جمال عبد الناصر

القاهرة - قصر القبة فى ٢٢ سبتمبر ١٩٦٨

عبد الناصر: عايزين نقعد النهارده لغاية ٨,٣٠ لأن قعدنا كثير الجمعة اللي فاتت، عايزين نختصر الكلام للعشر. فيه عندنا إيه مواضيع؟

الشافعى: فيه الموضوع الخاص بالشباب.

عبد الناصر: لا.. عايزين نأجله، لأن لسه برضه الصورة مش متبلورة فى ذهنى عن العلاقة بين الشباب ومنظمات الشباب.. نؤجله. إيه تانى؟

مصطفى: فيه مواضيع خاصة بأهالى السويس علشان تهجيرهم، عدد منهم جه سكن فى بعض مساكن القاهرة، فى الوقت الحاضر فيه طلب شديد على مساكن أخرى. المحافظة كذلك بتترغب إنها تنتقل ويكون لها مكان فى القاهرة، وبالمثل محافظة الإسماعيلية وأيضاً المطالب كثيرة.

جمعت محافظ السويس والإسماعيلية مع مديرى الشركات وجبنا الإحصائيات لهذه المساكن، تبين إن المساكن دى مخصصة للتمليك والقيمة اللي بيطلبوا تأجيرها بها إحنا قلنا: شغلة مؤقتة علشان بعد إزالة آثار العدوان يرجعوا. طالبين قيمة أقل من القيمة الإيجارية الصحيحة لهذه المساكن. كنت أحتاج الى توجيه من المجلس؛ هل ممكن نخليهم يشغلوا هذه المساكن شغلة مؤقتة بقيمة إيجارية مؤقتة تتناسب مع الدخول بتاعتهم الحالية؟

بس الشركات واخدة قروض وهذه القروض بفوائد، وتطالب بتحديد قيمة تعويض فى نظير الفرق بين القيمة اللي يشغلوا بها هذه المساكن والقيمة الإيجارية الصحيحة.

عبد الناصر: مين اللي اتكلم معاك فى المواضيع دى؟

مصطفى: محافظ السويس ومحافظ الإسماعيلية.

عبد الناصر: آه.

سرى للغاية

داوود: الاجتماع اللى عملته مع المحافظين الثلاثة.. الإسماعيلية وبورسعيد والسويس، أثرت هذه المشكلة وهى كواقع مشكلة قديمة، يعنى ماجدتش بس. ولكن حصل فى بنها وفى غيرها إشكالات حول المساكن الحكومية والمساكن اللى بناها جمعيات تعاونية لأن القيمة الإيجارية اللى طلباها مرتفعة؛ مثلا شقة ٣ أوض ١٤ جنية، المهجر كل اللى بياخده ٩ جنية فلو دفع كل المبلغ يبقى لسه باقى عليه من الإيجار! فهم طالبوا بمبالغ قليلة. حصل فرق بين المبالغ المستطاع دفعها والمبالغ المطلوبة لتسديد القروض وفوايدها، وإنهم يحتاجون الى جهة تتحمل هذه المبالغ. وهذه المبالغ لم توضع فى التقدير من المبالغ التى ندفعها التى تقدر للإعانة، فهى من ضمن المسائل التى جمعتها وبعتها للعرض.

الشافعى: بالنسبة للناس المهجرين محتاجين للرعاية، والرعاية كانت الدولة معدة نفسها إنها تقيم معسكرات للمهجرين، وخطة التهجير مبنية على الأماكن اللى ممكن التهجير إليها، فلما بتطول المدة الناس عايزة الحياة الخاصة وجزء من المهجرين تطلع إنه يأخذ المساكن المربوطة على أهداف وأغراض ناس آخرين سواء بالنسبة للسكن بالشراء أو بالإيجار؛ فالإيجار غير مناسب مع قدرة المهجر اللى الدولة بتدفعها. فالحقيقة لو سلمنا بالأمر الواقع إن فيه ناس جت واحتلت هذه المساكن، هيبقى فيه ناس مميزة وناس أقل امتياز اللى موجودين فى المعسكر، وهتخلق ردود فعل من الأعداد الكبيرة اللى موجودة فى المعسكرات. يجب أن ننظر للموضوع على كلياته مش الإسكان بس ومش وضع الدولة أمام الأمر الواقع، ونحط حلول أمام أمر واقع مايتمشيش مع قاعدة عامة.

عبد الناصر: هل هم خدوا البيوت خلاص؟

مصطفى: لا.. فيه بعضهم سكن، إنما فى الوقت الحاضر محافظة السويس عايزة تدى المواطنين اللى هناك وعائلاتهم وعايزة مقر. اتفقنا على مقر موجود هنا فى مدينة نصر مساكن إيجارية، وممكن المحافظة تنتقل وعايز يجيب الموظفين معاه.

عبد الناصر: طب نرفده أحسن! هيبقى هنا يعمل إيه؟! إحنا مش عايزينه هنا!(ضحك) هو المحافظ هيبقى يقعد هنا؟!!

جمعة: سيادتك كان فيه توجيه بتخفيف بعض المديریات زى الشؤون الاجتماعية اللى مالهاش طلب تخفف يعنى زى الاسماعيلية والسويس، هو بيفكر فى نقل بعض الموظفين.

سرى للغاية

داوود: هو الحقيقة المشكلة حجمها محدد، إحنا عارفين بالضبط عدد طالبى الإسكان أد إيه ومبحوث حالتهم، ودول بخلاف اللى ساكنين فى المعسكرات، فكل اللى طالبين سكن ومطلوب نحدد أماكن لهم بخلاف الأعداد اللى موجودة فعلا فى المعسكرات أو اللى احنا فى سبيل إيداعها مجددا فى معسكرات أخرى؛ اللى حصل إن هؤلاء الناس طالت بهم مشكلة البحث عن المساكن وطالت المدد، وقدامهم عمارات فاضية يطالبوا بسكن هذه العمارات، محدش بيرد عليهم ومحدش بيمكنهم منها ومشتتين وبعضهم الى الآن موجود فى لوكاندات أو أعباء على أسر أخرى فى أوضة واحدة!

فأخيرا راحوا على العمارات الموجودة وأقاموا فيها، وتدخلت جهات متعددة وبحثناهم فنتبين فعلا إن فيه ٣٠٠ أسرة من اللى دخلوا دول مستحقين وتتنطبق عليهم الشروط، ولم يكونوا مقيمين فى معسكرات إنما هاجروا مؤخرا من الاسماعيلية والسويس.

لازالت هناك أعداد حوالى ٣ آلاف طلب، ومبحوثين وكلهم يتطلعوا الى السكن ومش لاقبين مساكن!

القطاع الخاص مافيش فيه ما يكفى، وحتى لو وجد فيه ما يكفى لا يقدر عليه المهاجر لأنه عاوز مقدم وعاوز ولا يستطيع أن يقدمه. ودى يمكن من أهم المشاكل اللى كانت تثير مشاكل فى الاجتماعات، وكان اتخذ قرار على أساس إن الضغط كله مايقاش فى القاهرة؛ كل محافظة تحدد نسبة من المساكن اللى عندها بحيث مانضغطش على القاهرة، وماتيسرش هذا أيضا لأن كل المحافظات تقريبا تعاني من المشكلة.

جمعة: هو بالنسبة سيادتكم لمشكلة الإسكان الموجودة فى الاسماعيلية والسويس، هنزيد كمان يافندم لأن كل دول اللى تم تهجيرهم حتى الآن، فإذا تم التفكير فى تهجير المصانع هتزداد المشكلة. بالإضافة الى كده لازم نعمل حساب بورسعيد لأن فيه تفكير برضه على بورسعيد. فتصورى إن مشكلة الإسكان لازم تدرس ككل بالنسبة للـ ٣ محافظات معا.

هويدى: هو يافندم النقطة اللى كان أثارها سيادة النائب حسين الشافعى بخصوص الناس المقيمة فى المعسكرات، ويقالهم فعلا فترة طويلة جدا لكن فعلا عندهم نوع من حالة القلق. فأنا بقول: تخفيفا للعملية، أنا أؤيد الأخ شعرواى بخصوص بحث الموضوع ككل بالنسبة للـ ٣ محافظات، علاوة على كده إن الناس اللى قعدت فترة طويلة فى المحافظات تعطى أسبقية.

يعنى الإخلاء يتم من المعسكر الى بيت سكنى موجود فى أى مكان والمهجر الجديد يذهب الى داخل المعسكر؛ على أساس أدى فرصة للناس اللى قاعد النهارده بقاله سنة ومتضايق ممكن أمتص الضيق بتاعه شوية لما أسكنه فى بيت رخيص ولا حاجة.

سرى للغاية

عبد الناصر: هو الشفق اللي عندكم أد إيه؟

مصطفى: فيه ٩٠٠ ممكن إنهم يتسلموهم.

عبد الناصر: دول هيتملكوا يعنى.

مصطفى: هم معروضين للتملك.

الشافعى: إذا سمح سيادة الرئيس، إذا كانت لجنة من الشؤون الاجتماعية والإسكان والخزانة يبحثوا الموضوع بأطرافه كلها وتقدم اقتراحات؛ بحيث إننا نبقى متأكدين إذا زادت المشكلة نبقى عارفين مبادئ محددة والتزاماتها بالضبط.

عبد الناصر: تبقى لجنة برئاسة الأخ حسين الشافعى ونشوف الموضوع الأسبوع ده.

داوود: هو بالنسبة للمعسكرات، إحنا حلينا مشكلتهم هذا الأسبوع حل جزئى لأنه مكانش بيقبلوا إنهم يخرجوا خارج المعسكرات مهما كان الإغراء؛ خشية إن الإعانة اللي بياخذوها تنخفض لأن الإعانة جوه المعسكر ١٢ جنيه وبره المعسكر ٩ جنيه، فكان يخشى لو خرج تنخفض الإعانة. فجينا الأسبوع ده وقلنا: اللي يستطيع إنه يدبر نفسه إقامة فى إحدى القرى - يعنى مايجيش المدن - على نفقته الخاصة نحتفظ له بنفس الإعانة اللي هو بياخذها. ودى فعلا فرجت لأن بعضهم له بلاد أصلية ومشيت العملية على هذا الأساس.

مصطفى: هى مشكلة الموظفين.

عبد الناصر: على العموم تشوفوا العملية مع الأخ حسين.

الشافعى: نجتمع يوم الأربعاء الساعة ١٠,٣٠.

عبد الناصر: كان فيه كنت مقدم مذكرة؟

سرى للغاية

زكى: أيوه يافندم.. كان فيه اتفاق بينا وبين ليبيا إن يبقى فيه شركة تأمين مشتركة برأسمال ١٠٠ ألف جنيه، هم يحطوا ٦٠٪ وإحنا ٤٠٪. عرضنا الموضوع على اللجنة الاقتصادية، وافقت عليه لكن مجلس الدولة أفتى بأن مايجوزش موافقة، لا يكتفى بموافقة اللجنة الاقتصادية ولا بد من الحصول على موافقة مجلس الوزراء؛ فأنا بعرض الموضوع برضه لنوضح ناحيتين من حيث الشكل والموضوع: من حيث الشكل: برضه إن مستقبلا تعتبر موافقة اللجنة الاقتصادية هي الموافقة طالما أن قراراتها بتعرض على مجلس الوزراء.

النقطة الثانية: الموافقة على إنشاء الشركة علشان إحنا مضينا فعلا عقد بكده.

زى دى برضه إتفاقنا مع السودان، لأن السودان لما ابتدوا عملوا قوانين السودنة مقدروش ينفذوها وتعبانين ومش قادرين يمشوها، فكانوا قالوا لنا يعنى إننا نساعدهم. قلنا لهم: إنتم تطلبوا وإحنا ندرس علشان ميبقاش فيه، يعنى إننا تقبلنا بدينا بشئ، فقالوا: عايزين ندرّب سودانيين لعمليات التأميين وعايزين نعمل شركة مشتركة؛ لأن عندنا واردات وصادرات وعائدات كبيرة نرجو أنها تخش معنا فيها. فإحنا وافقنا على إننا برضه فيه شركة مشتركة بـ ٢٠٠ ألف جنيه، ٥٠٪ و ٥٠٪، والمؤسسة عندها المبالغ باعتماداتها.. فببرجو موافقة المجلس.

عبد الناصر: بالنسبة للرز؟

زكى: الرز يافندم.. هنجتمع يوم الثلاثاء، يوم الثلاثاء إن شاء الله الصبح هنتظر فى موضوع الحيازة وموضوع السعر اللي فى السوق المحلى.

عبد الناصر: هو الحقيقة لو إحنا وحدنا السعر يبقى أحسن، لأن اللي باين دلوقتي إن احنا ملخبطين الناس وتاعبين الناس. الحقيقة كل ما نيسر لهم تبقى دى العملية الصحيحة، ويعدين برضه مافيش معنى إن احنا عاملين السعر بتمن يتباع بـ ٧ قروش أو ٦ قروش.

موضوع الرغبة بقى، أول ما جيت من الاتحاد السوفيتى أول حاجة سمعتها عليها ويعدين جات لى منك مذكرة ثم مذكرة. معرفش هل حد منكم سامع إن الرغبة بقت حالته سودة ولا يؤكل، ولا ماسمعتوش!؟

يعنى أنا أول ما جيت كنت منقطع كلية، وابتديت أسأل: على إيه الكلام؟ إيه وإيه؟! من أول الحاجات اللي جات لى وأنا كنت أثيرها فى مجلس الوزراء اللي فات، ولكن يعنى الواحد سهى عن الموضوع.

فالحقيقة إن ماقدرش ندى الناس رغبة بالردة الخسنة كمان يعنى! الاستخراج كان كام٪؟

عبد الناصر: يعنى موصلش أبدا الوضع بهذا الشكل! كان الأول قل لنا على الموضوع.

مرزبان: أيوه يافندم.. هو الأول هي تطورت عدة تطورات، هو المفروض إن الاستخلاص الطبيعي ٨٢٪ ده العادى يعنى فى أغلب الدول؛ على أساس بيطلع السن الأحمر وهو ٥,٥٪ ويطلع الردة الناعمة ويطلع أيضا الردة الخشنة.

وبعدين جه فى ظروف أبقا السن الأحمر على اعتبار إنه من الناحية الصحية مافيش مانع، وأبقوا بيطلعوا الردين الخشنة والناعمة فيبقى نسبة الاستخلاص ٨٧,٥٪ ومشت عليه فترة طويلة. اللي حصل منذ يونيه ٦٧ بعد العدوان، أدخلوا الردة الناعمة بالكامل فيها، كان فيه اقتراح إنها تدخل جزئية بالنص بحيث يبقى ٩٠٪، وبعدين شافوا إن برضه فيه احتمال الغش لأن الرقابة بتاعتها بتبقى صعبة، فأدخلوا الردة بالكامل الناعمة وخلوا الخشنة برة. هي الخشنة بالضرورة لا تصلح للغذاء الأدمى يعنى هي لا تستخدم إلا فى العلف، وللدواجن وللماشية، وهي خشنة يعنى زى نشارة خشب يعنى لا تصلح لأى شئ!

وبعدين الخطأ إنهم بيطلعوا الردة الناعمة كلها فى وسط الدقيق، وبعدين بيدوا الردة الخشنة دى للمخابز علشان ترغف عليها تحت العيش، فنكون فى عملية الترغيف بيحطوا نسبة عالية وتقوم حتى بيتطور على وش الرغيف فبيسئ الى منظره، فبيكون كله زى النشارة وحش!

الحقيقة إحنا بحثنا العملية بعد ما تعددت برضه عدت شكاوى، وكان رد المؤسسات والمطاحن على البتاع ده كله على نسب الاستخراج الـ ٩٣٪ هي بطبيعتها عالية، وإن نسبة الردة الناعمة التي بدت تدخل كلها.

الوسيلة الوحيدة إن احنا نخرجها علشان نحسن رغيف العيش، ودي كانت من أولى المسائل اللي اهتمت بيها فى الحقيقة باعتبار إنها إحدى الأشياء الأساسية اللي احنا نبحثها، لكن شوفنا الأعباء اللي بتترتب عليها. علشان أنا أطلع الردة الناعمة كلية، يبقى محتاج إن أنا أزود كمية القمح اللي داخل علشان أضمن نفس كمية الدقيق اللي خارجة. دى معناها إن لا بد إنى أدخل ١١٩ ألف طن قمح زيادة، شفتنا قيمتها لقيناها حوالى ٤,٦ مليون جنيه.

طبعاً كان العائد دائماً والسؤال بيتور، إن ده مهوش الوقت المناسب خاصة إن القمح اللي أنا باستورده وبادفعه بالعملات الأجنبية؛ يبقى صعب إن أنا أقدم على هذه المرحلة وأطالب بيها فى الوقت الحاضر. فعملنا عدة دراسات لمحاولة لتعويض هذا الى حد ما، وممكن الخسائر المحلية الـ ٤ مليون نعوضها باعتبار الردة الخشنة دى نفسها كميتها أصبحت محدودة، وبتروح السوق السوداء رغم إن احنا بنبيعها بـ ١٧ مليم الكيلو يعنى ١٧ جنيه الطن، بتتباع فى السوق السودا ما بين ٢٠ و ٢٥ فى الطن

سرى للغاية

لأنها بتتأخذ لنقص الكسب والعلف فتتأخذ أيضا للدواجن وللماشية، فهي مطلوبة. فقلنا لو زدنا السعر ممكن تعوض ٢,٥ مليون، وبذلك نقدر نركز الخسارة. لكن برضه Still إحنا لازم نستورد ١١٩ الف طن زيادة قمح، ولإزم ندفع عملة حرة عبء على ميزان المدفوعات، فسيينا العملية فى وضع دراسات عديدة. لكن تعدد الشكاوى الحقيقة أثبت الى إن العيب مهواش بس فى لون العيش، والناس عندها استقبال للتضحية فى هذا الطرف.. العيش يبقى أسمر شوية معلىش يبقى برضه أهو فيه ظروف حربية وظروف معركة إحنا نقدر نتحمل، لكن بدء الإثارة الى أن فيه رمل فيه ظلط فيه مواد غريبة، اللون وحش، نسبة الخبز وحشة؛ فعملنا إيه؟ بقالنا أسبوع أو عشر أيام فيه حملات متوالية على المطاحن وعلى المخابز.

الصورة الحقيقة اللي جاتنى بينت صورة عكس ما كان الواحد متصور؛ إن العيب مش من المخابز أساسا لا فى القطاع العام ولا فى القطاع الخاص، إنما هى منا إحنا فى المطاحن لأن الدقيق اللي بيصنف هو نفسه سئ فى الزلط وفيه الردة نسبة عالية، وفيه.. وفيه.. الى آخره. فعملنا الحملة على المطاحن نفسها، مع مديريات التموين ومباحث التموين ومؤسسة المطاحن كلها، شفنا الحقيقة حالة المطاحن نفسها فى حالة يرثى لها؛ يعنى أغلبها مطاحن مستهلكة وعمرها ما بين ٦٠ و ١٥٠ سنة! وفيه مشروعات توسعات وماشية ببطء، ويمكن برضه إديناها الأولوية إن إحنا نعمل فيها عمليات تجديد.. الى آخره. وتعاقدنا على ١٠ مطاحن و ٨ مطاحن بعيدين تشيكوسلوفاكى، وماشيين فى العملية لكن هتأخذ وقت بجانب عملية التوسع والإحلال ده كله.

الحقيقة شوفنا إن فيه إهمال شديد فى إدارة المطاحن، الإهمال ناتج من إن الإعانة المقررة للمطاحن لتعويضها عن الطحن ٦٢٩ ألف فى الميزانية غير كافيها وبيتحملوا خسائر، فكل شركة عاوزه تحاول تغطية هذا الفرق إن هى تحرص على تحقيق أرباح أو على الأقل ماتظهرش بخسارة، فتكون حتى ٩٣% اللي إحنا بنعترض عليها إنها تزيد عن ٩٣%؛ بدليل إنه بيطلع بعض الرده الخشنة وبينعموها، وبعدين بيرجع يخلطها بالدقيق فتكون نسبة الاستخلاص مش ٩٣ أحيانا بيتجاوزها الى ٩٤ أو ٩٥.

وإحنا إدينا توجيه الحقيقة، علشان بدل ما تدى للناس رده خشنه وتسى الى مصدر الرغيف الى إنها تطحن وتعطى كردة ناعمة.. يبقى فى الصورة دى أحسن، فالمطاحن استغلت هذا الوضع وأصبحت بتخلط الردة الناعمة أو بتبيعها.

إحنا عملنا عدة إجراءات فيها حاجات تانية؛ شوفنا فيه بعض المطاحن فى منتهى القذارة.. أنا روحت وشفنت واحد واتنين الحقيقة الواحد ميتصورش إنه عايش فى القرون الوسطى، العملية بدائية وأقل من البدائية خالص؛ بيكنس الأرضية بما فيها من دقيق وبما فيها من تراب وشايل كل حاجة ويروح حاطتها فى قلب شوال الدقيق بمنتهى البساطة بدل ما يدخل ينخلها تانى وينضفها؛ فالعملية مافيش فيها رقابة ومافيش فيها مسئوليه فطبعا دى بتسى.

سرى للغاية

فيه عوامل أخرى شفاها وطبعا حاولت المطاحن تدافع عن نفسها، وجابوا لى عينات إن فيه بعض أنواع من القمح المستوردة وخاصة إن فيه قمح إيراني مليانة زلط، ويمكن دى الشكاوى الأخيرة فيها.

القمح الإيراني بطبيعته بيدي دقيق لونه أبيض شوية، فافتكروا إن دى ميزه فبالغوا فى الاستهلاك منه، وبعدين اتضح إن فيه زلطة رفيعة فى حجم حبة القمح فبتنزل من الغربال عادى مع الدقيق، وهى زلطة متحجرة غير قابله للطحن فبينزل فى قلب العيش؛ وبالتالي فعلا رغيف الخبز بيبقى فيه هذه الزلطة، واتضح أيضا إن نفس القمح الإيراني ده - وكانوا بيستخدموه للخلط بنسبة كبيرة من حوالى شهر ويمكن ده اللى عمل الأزمة الأخيرة - فيه حبة اسمها الوزان - حاجة زى كدا - ودى بطبيعتها حبة غريبة، بنسبة ٢٧ حبة فى الكيلو بتطحن مش بتبان، بس أول ما تتعجن ويتخلط عليها مياه بتتحول الى لون أزرق ويتدى مادة سوداء أو زرقاء بتسئى للرغيف. وجابوا من الخبز بعض هذه العينات، فأنا وقفت الصرّف من القمح الإيراني من ٣ أيام بعد ما كانوا بيخلطوا به علشان يحس اللون. وقفنا أيضا صرف الردة الخشنة كلية، ووقفنا حجر أو حجرين من كل مطحن ونخصصهم الى أن كل الردة الخشنة تطحن الى ناعمة. وبعدين علشان المخابز ماتستغلش الردة الناعمة إن هى تخلطها زى ما كان المطاحن بتعملها، قلنا: مانديهمش غير ٢ كيلو عن كل شوال ودى بالكاد تكفى لعملية الرغف.

وبعدين فيه رقابة على الإهمال والوساخة والنظافة عامة، تبين لنا فى بعض المطاحن كان المنخل بيتقطع وبالرغم من ذلك بيفضل مقطوع وبيشتغل يوم ولاّ اتنين الى أن يصلحوه لأن فيه ميزانية معينة لكل مطحن لاستبدال المناخل. فالمنخل بيتقطع، مادام إنقطع يبقى أصبح زى قلته العملية بينزل الدقيق زى ما هو بوساخته بكل حاجة، فطبعا قلنا: حتى دى لو كلفتهم أعباء أنا رفعت سعر الردة الناعمة اللى هنبيعها من ١٧ مليم الى ١٨ مليم، الفرق ده بسيط - زى ما قلت - إذا كان السعر فى السوق العادية بيتراوح من ٢٠ الى ٢٥ مليم دى هتجيب لنا ٢٥ ألف جنيه كإيراد المطاحن من هذا المليم. وقلنا: ده يخصص للأعباء الجديدة نتيجة النظافة ونتيجة الطحن وتعطيل بعض الحجارات وطحن الردة الخشنة الى ناعمة، وأيضا فى عمليه استبدال المناخل.

وبعدين حددنا المسؤولين عن الإنتاج فى كل مطحن من المطاحن فى الورديات الثلاثة وبالاسم والحقيقة أنا هددتهم، وأنا بعث لسيداتك مذكرات فى هذا الموضوع وإن سيادتك مهتم بهذه العملية ولها صدى سئى، وإن العملية يعنى لو أدت الى فصل اتنين أو ثلاثة خلال هذا الأسبوع سواء من رؤساء الشركات أو من مديرى المطاحن أو المسؤولين عن الإنتاج، لابد أن نأخذ هذا الاجراء علشان نعالج هذا الاهمال. ففعلا إن لدرجة إنهم إترجونى فى إن أنا أبقي هذه العملية ليوم السبت.. إحنا شغالين من يوم الأربعاء والخميس والجمعة، وفعلا التقارير بتدل على إنهم بياخدوا احتياطات النهارده أحسن بكثير. أنا معتقد إن الإجراءات دى مافيش شك إنها تعالج الوضع بتاع تحسين الرغيف، لكن نسبة الاستخلاص هتبقى زى ما هى لأن طبعا الموضوع الثانى موضوع كبير وفيه أعباء.

سرى للغاية

ده الوضع اللى أخذناه لأن فعلا العيش كان سئ.

النقطة الثانية: فى المخابز برضه فيه إهمال، يعنى مش مافيش المخابز برضه حالتها قديمة وسيئة ومتخلفة ومافيش تطوير وعددها كبير؛ يعنى القطاع الخاص فيه ٤٧٠ مخبز فى القاهرة وحدها كلهم قطاع خاص، مطاحن القطاع العام لا يتعدى الـ ٦٠ واحد بجانب الـ ٤٧٠. مخابز القطاع الخاص فى مستوى الجمهورية كله - فيما عدا القاهرة - كله قطاع خاص يعنى مافيش قطاع عام. فيه مشروعات للمخابز المحسنة، وإحنا بدأنا فعلا بقوا انتين واحد فى ميت عقبة فى الجيزة وواحد فى مدينة نصر هيشغل الشهر اللى جاى، والإنتاج بتاعهم مافيش شك إنه أحسن وساعد الى حد ما إنه يطلع الرغيف محسن.

فيه أربع مخابز جارى التنفيذ فيها فى الأحياء الشعبية خصوصا، والمفروض تخلص آخر العام وإحنا بنضغط إنها تخلص قبل نهاية يونيه اللى جاى بتخلص فى ٣ أو ٤ شهور.

فيه بعض المحافظات برضه قايمين فى دمياط والمنصورة وطنطا المخابز محسنة، لكن الحقيقة الاعتماد اللى كان مطلوب للمخابز المحسنة علشان أحل محل كل المخابز الصغيرة كان مطلوب للقاهرة وحدها عدد كبير يمكن يصل الى ٧ مليون جنيه! طب إحنا السنة دى ماخذناش اعتماد لهذا وسبنا العملية، لكن الحقيقة هو ده الحل لعملية المخابز لأنها متخلفة وفى أماكن ضيقة وصعب تطويرها وأصحابها مش بيعملوا أى تطوير أو تحسين فيها، من حيث المكان نفسه ضيق وقدر، من حيث العمال منتهى الإهمال يعنى التصرفات والأكل والشرب أثناء عملية الرغف!

فيه نقطة اللى كانت أثرت فى بعض المخابز اللى كان مستولى عليها وكانت تشتغل للقطاع العام وبعدين إحنا سبناها، الحقيقة إحنا كنا حريصين إن إحنا نتتبع الإنتاج فيها. التقارير اللى عندى - قلنا: يمكن تكون دى عامل - التقارير اللى عندى من مباحث التمويل ومديرية التموين ومؤسسات المطاحن والشركات نفسها، إن هى أحسن حال مما كانت عليه معانا فى الوقت الأول، إن أنا يمكن التركيز كله كان على المطاحن نفسها والإصلاح اللى فيها؛ فعليه المخابز إحنا برضه ماشيين فى عملية التحسين وعملية الرقابة.

هو كانت أثرت نقطة ثانية.. هى خاصة بالقطر بتاع العيش، الى إن بيحاولوا إن يعملوا الرغيف أقل قطر ممكن علشان يحقق الوزن ويكسب أكثر. فإحنا برضه عدلنا دى الى ١٩ سم وبنحاول نضغط عليه، ويمكن هنجد مقاومة شوية وصعوبة فى الرتبة لأن دى تؤدى الى إن شكل الرغيف يبقى أحسن ويبقى جاف أكثر، مش هيبقى فيه نسبة رطوبة واللبابة اللى هى موجودة من الرغيف الضيق والصغير. إحنا ماشيين يعنى فى مستوى رقابة شديد، أنا أعتقد إن ممكن فى خلال الأسبوع اللى جاى لا بد أن يكون فيه تحسين فى الدقيق وبالتالي مش هيبقى فيه شكوى من الزلط والرمل واللون الأسود.. لآخره بقدر الإمكان.

سرى للغاية

لكن طبعا دى ماتمنعش إن اللون هيبقى الأسمر؛ لأن نسبة الاستخلاص ٩٣ نسبة عالية مافيش شك. وأيضا فيه عامل تانى الحقيقة مهم، وده اللي بنشوفه إن فى الأرياف والمحافظات بنجد إن لون العيش أحسن من لون القاهرة؛ لأن الوحيد اللي يدى اللون الأبيض هو الدقيق البلدى.. القمح البلدى بتاعنا والأسترالى والفرنساوى، فيما عدا هذا القمح اللي بنجيبه من أوروبا أو من الدول الشرقية، وده كله الحبة بتاعته حمراء والقشرة بتاعته حمراء ففى الطحن بنتدى لون أسمر، طبعا تقليل نسبة الاستخلاص هتحسن لكن مش هتكون زى القمح بتاعنا. ده يعنى خلاصة الموقف كله بالنسبة لرغيف العيش.

عبد الناصر: يعنى الجمعة الجاية هيبقى أحسن؟

مرزبان: آه.. إن شاء الله. أرجو هذا.

عبد الناصر: بالنسبة للخطة التنفيذية لبيان ٣٠ مارس من وزارة المواصلات والنقل والإنتاج الحربى والعمل، بتروح لعند السيد حسين الشافعى وهيبحت الموضوع. فى الحقيقة هنقعد نبحت المواصلات وتوفير الخدمات وهنبحت الحاجات دى يعنى مش هنخلص أبدا العملية! يعنى خدمة الترنك والخدمة التليفونية اليدوية بيتهيالى تروحوا فى اللجان، إذا كان فيه مشاكل بتيجى لنا المشاكل هنا إذا كان الموضوع ماشى يمشى. وزارة الشباب هانشوفها الجمعة الجاية إن شاء الله.

مراد: قوانين التعليم سيادتكم أمرت إن احنا نخصص لها جلسات أنا انتهيت فعلا.

عبد الناصر: والله برضه أنا أصلا عملية قوانين التعليم أنا بالى مش طويل فيها أو قوانين الموظفين، والكلام ده مابعرفش أشغل فيه، يعنى تروح عند السيد حسين الشافعى بتلم أكثر من السادة الوزراء ولو فيه مشكلة تيجوا لنا فيها فى الآخر بتريحنى يعنى! (ضحك)

مراد: حولتها لمجلس الدولة النهارده ٣ قوانين تعليم عام وفنى وخاص، وبعث لسكرتارية الحكومة النهارده نسخ من هذا.

عبد الناصر: السيد حسين الشافعى بكره هيعمل لك جلسة! (ضحك)

سرى للغاية

الشافعى: حاضر.

شقير: لو أدنت لى يافندم هو فيه سياسة التعليم ككل علشان مشروعات التعليم العالى أيضا، وفى الأسبوع القادم بيكون سياسة التعليم العالى ككل.

عبد الناصر: وبرضه تحضر، أنا من رأيى أنتم الاتنين تحضروا هنا وهنا.

مراد: ما إحنا أعضاء فى نفس اللجنة.

عبد الناصر: البحث العلمى أيضا علشان التنسيق فى نفس العملية إذا كان فيه بقى مشاكل أو عقد.

الحقيقة بالنسبة للتعليم كل اللى أنا أرجوه هو عدة مبادئ..

أولا: بنعلم الأولاد فعلا، مش مانعلمهم مش يروحوا المدرسة ويطلعوا من المدرسة مايعرفوش يقرأوا ويكتبوا فى المدرسة الابتدائية! دى أول نقطة عاوزين نعلمهم.

ثانيا: ماننقلش عليهم ماندهمش حاجات مافيش داعى إنهم ياخدوها، يعنى الحقيقة ثانوى النهارده بقى صعب أوى على الأولاد يعنى أيا منا مكانش فيه تفاضل ولا تكامل برغم إن أنا أدبى! (ضحك) ورحت الكلية الحربية إدونا ميكانيكا وحساب مثلثات! (ضحك)

يعنى سن الـ ١٧ أو ١٣ سنة بيبقى عليهم ارهاق شديد وبقيت عملية التوجيهية النهارده بقت صراع!

العملية الثانية: بما إن العدد بيزيد كل سنة من التوجيهية، لازم نزود الجامعة.. لازم كل سنة نزود الجامعة بنسبة زيادة خريجي المدارس الثانوى وإلا هنبقى مقصرين!

يعنى أنا من يوم ما قررت التعليم المجانى أنا حصلت لى المشاكل، تانى سنة بنتى مادخلتش! (ضحك) والسنة دى عبد الحميد جاب ٥٨ جاب فى الرياضة نمرة عالية جدا وسقط فى علم الأحياء فهنوديه الجيش يعنى!

صوت: الجيش وحش يافندم! (ضحك)

أصوات: (ضحك)

سرى للغاية

عبد الناصر: (ضحك) ده هايروح ليه؟ هيروح لسبب بس إن أبوه ضابط.. مش كده؟

ف. فوزى: إحنا بناخد من ٥٠٪ وهو جايب ٥٨,٣٪ يعنى سيادتك مالکش دخل فى الموضوع.

عبد الناصر: فلانم نعمل حساب إن احنا نزود الجامعة كل سنة.

حجازى: بالنسبة للكليات النظرية بالذات، يعنى احنا عمالين نضغط على جامعة القاهرة بـ ٣ - ٤ جامعات؛ عملية غير مستحبة وغير معقولة.

عبد الناصر: لأن السنة دى كام واحد أخذ التوجيهية؟

مراد: ٧٦ ألف.

عبد الناصر: يبقى السنة اللي جاية هيبقى كام؟

شقىر: مش هنتكرر السنة اللي جاية.

مراد: بالقوانين الجديدة بتاعتنا.

شقىر: لأن الإصلاح فى التعليم أساسا، لازم نتفق عليه مع وزير التعليم.. تطوير هيكل التعليم العام وتطوير نظم الامتحانات فيه لأن الـ ٧٦ ألف دول طالعين لعدة أسباب..

أولا: التعليم الفنى عندنا فى مرحلة الثانوية أصبح محدش بيدخله غير نسبة ضئيلة جدا. معظم الناس مركزة على تعليم الثانوى العام علشان يدخل الجامعة، بينما إحنا فى حاجة الى نوع من الفنيين يتخرج من الثانوية الفنية أو من نوع مدرسة..

عبد الناصر: طيب ما بيتخرجوا ومابيشتغلوش!

شقىر: لأن مجالهم يافندم بيبقى مش ملائم مع احتياجات السوق، فلا بد يكون فيه تعليم مع الفروع اللي السوق محتاجها.

سرى للغاية

مراد: إحنا غيرنا الشعب السنة دى.

عبد الناصر: ده أنا شغلتهم بالعافية هنا فى مجلس الوزراء!

شقير: الناحية الثانية يافندم نظم الامتحانات: نظم الامتحانات غريبة الشكل، الطالب بيفضل ١٠ سنين فى الثانوية العامة، الطالب بيرمح الست السنين اللى فى ابتدائى، يخش فى إعدادى ويستطيع إنه ينتقل من سنة الى سنة مع السقوط فى مادتين، ويخش فى الثانوى نفس العملية والثانوية العامة يقدر يطلع بأقل من ٥٠٪ وساقط مادتين.

لو سيادتكم أخذنا الـ ٧٦ ألف الموجودين يافندم، نجد فيهم الآتى: ٥٣ ألف عبارة عن تلاميذ ناجحين بـ ٥٠٪، وحوالى ٢٣ ألف أقل من ٥٠٪؛ فالسنة الجاية الـ ٢٣ ألف مش هيكونوا موجودين. بعدين الـ ٥٣ ألف فيهم ١٠ آلاف ناجحين مع سقوط فى مواد، وده غير طبيعى جدا! وبعدين من الـ ٧٦ ألف منهم أشخاص بيعيدوا الثانوية العامة لرابع أو لخامس سنة، وهو نظام غير موجود فى أى بلد فى العالم غيرنا إحنا! بيحددوا عدد مرات الدخول فى الامتحان. القانون الجديد، السيد وزير التربية والتعليم بالاتفاق معنا بيعالج هذه النواحي. فى تقديرى إن تطبيق هذه النواحي بيطلع لنا السنة الجاية حد أقصى ٤٥ ألف طالب.

عبد الناصر: بدل كام؟

شقير: بدل ٧٦ ألف. طبعا أنا أحتاج للتوسع فى الجامعات ويمكن أحتاج للتهيئة لمدة قبل ما نتخذ فيه قرار؛ لأن لسه عندى نقص شديد فى الأساتذة فى بعض الكليات، أمامنا تطوير المعاهد العليا الصناعية.

عبد الناصر: بعدين بالنسبة للى بيسقطوا فى الجامعة إحنا اتكلمنا إنهم يدفعوا رسوم، ده أيضا لازم يطبق الحقيقة ويعنى نخلي الناس تشتغل علشان تتجح، فيه ناس فى الجامعة دلوقتى فى سنة ٣ سنين - ٤ سنين!

شقير: ده فيه ناس قاعدة ١٢ سنة!

مراد: يافندم فيه مشكلة تانية فى التعليم العام: موضوع الأبنية المدرسية: دى مسألة خطيرة جدا لأن المدارس بدأت تشتغل فترتين وبعضهم يشتغل ٣. السنة دى منعنا الفترة الثالثة، لكن ده بيؤثر على كفاءة التعليم والعيال بيرجعوا بعد الظهر بيبقوا مرهقين، طوال النهار مثلا بيلعبوا وييجوا يحضروا بعض الظهر بيبقى فيه إرهاق خلاص والعملية بتزيد باستمرار.

سرى للغاية

أنا وجدت إن وزارة التربية والتعليم فيها فلوس، والأستاذ الدكتور عبد العزيز حجازى خد باله منها فكان عاوز يستولى عليها!

أنا وجدت فيه رسوم معامل مركونة مابستخدامش، وفيه رسوم التأمين للطلبة ضد الحوادث وماتستعملش! ده يطلع حوالى مليون جنيه وكسور. فأنا بعد إن سيادتك باعمل دلوقتى مشروع قانونى هنعمل صندوق للأبنية المدرسية ونخصص لها هذا المبلغ، وتبنى مبانى مدرسية تأجرها منها وزارة التربية والتعليم وتدفع الإيجارات وتدفع منها تعويض لحوادث الطلبة والصرف على المعامل. واكتشفت إن وزارة التربية والتعليم لها أراضى فى القاهرة كثيرة ممكن استخدامها؛ يعنى قطعة الأرض على الناصية قصاد مسرح البالون ملك للتربية والتعليم محدش يعرفها! فيه فى شارع القصر العينى قطعة أرض فيها جراج مافيهاش غير بس سيارة الوزير وتصلح.. فى شارع القصر العينى فى وسط البلد! وقطعة أيضا خلف كلية هندسة عين شمس أيضا ممكن استخدامها.

وبعدين فيه فى الأرياف التمويل الذاتى، فيه كثير من الأهالى تبرعوا بأراضى وبنوا عليها بعض الأبنية.. عواميد مسلحة وحيطان مش قادرين يكملوا، فأنا بعمل لها حصر الآن. وبعض هذه المدارس محتاجة ٥٠٠ - ١٠٠٠ جنيه علشان تستكمل وتبقى مدرسة وتفتح. فممكن فى ظرف سنة نفتح عدد كبير من المدارس يخفوا هذه العملية.

بس نرجو حماية سيادتك من وزارة الخزانة علشان ماتاخدش مننا هذا المبلغ!

حجازى: قلنا بس عايزين نعرف الحاجات دى مش ضرورى ناخدها! هو ١,٢٥ مليون تأمين معامل بياخدوه من التلامذة ومايبستخدامش وبعدين بيتحوش، وأنا عرفته بطريق الصدفة وعرفت إن وزارة التعليم عايزة تعمله شهادات استثمار! فقلت لأ..

مراد: أبنية؟! هيجل موضوع كبير قوى.

حجازى: بقول: نعمل صندوق ويبقى تمويل ذاتى لهذا الموضوع.

عبد الناصر: هو الحقيقة اللي احنا عايزينه فى التعليم الابتدائى، إن الأولاد يعتمدوا على المدرسة مش على المدرس الخصوصى وبرضه مش على أبوهم وأمهم؛ يعنى بالنسبة لأغلبية الأسر يعنى الأم فى الفلاحين وكذا ماتقدرش تعلم الولد.

سرى للغاية

مراد: إحنا عملنا فى القانون الجديد ترقية المدرس مرتبطة بنتائج تلاميذه، فهو ده اللى هيخليه يهتم. وبعدين إحنا دخلنا فى نظام الامتحانات، الامتحانات مش داخل المدرسة، الامتحان على مستوى المناطق لتقويم المدرس نفسه بحيث هو هيبقى له صالح فى إنه يدرس كويس وإنه ينجح، وده هيخفف من عبء الدروس الخصوصية إن شاء الله.

عبد الناصر: بالنسبة للخطة، لحد دلوقتى شهر.. إمتى؟ هل ماشية الخطة ولا مش ماشية؟ أنا كنت كلمت أنور السادات من تسخالطوبو وقلت له يتصل ويسأل.. هل منيمين الخطة ولا ممشيين الخطة؟ لأن إذا نيمناها من الأول مش هنلحق نمشيها!

صدقى: ماهى مش ماشية!

عبد الناصر: إزاي؟!

صدقى: الاعتمادات كلها ماصرفتتش! يعنى كان فيه نص فى الميزانية فى إنه المشروعات حتى المعتمدة فى الميزانية الجديدة تعرض على اللجنة الاقتصادية.

فالحقيقة وبعدين كان فيه عندنا مثلا ٧٢ مليون أو ٧٣ مليون جنيه استثمارات الخزانة المفروض تمولها، لغاية يمكن ١٠ أيام أو ١٥ يوم خدنا ٣ مليون! وأنا الحقيقة كلمت الدكتور عبد العزيز حجازى، فبرضه أثار موضوع إن فيه تأشيرة فى الميزانية، واتصلت بالدكتور سيد جاب الله، قال: إنهم موافقين على المشروعات، قالوا: لأ.. أيضا لازم يكون النقل موفر المبالغ. كلمت الأخ حسن عباس وافق على التمويل، فكلمت الدكتور عبد العزيز حجازى فالحقيقة يعنى..

عبد الناصر: دلوقتى الحقيقة الخطة اللى اتفقنا عليها لازم تمشى وإلا يبقى بنضحك على نفسنا! إحنا حاطين تنمية كام% يا أخ عبد العزيز؟

حجازى: ٤%.

عبد الناصر: لأ.. السنة دى طالبين أكثر من كده.. طالبين ٥%. إنت المسئول إنت وحسن عباس أو هنوقفكم فى ميدان العباسية (ضحك) وصدقى معاكم! يعنى ماتقعدوش تنيموا العملية وتضحكوا علينا يبقى مانعملش خطة!

تقولوا لنا: إيه العملية.. إيه المشكلة بالذات؟

سرى للغاية

حجازى: لو سمحت يافندم، يعنى مادام الموضوع اتفتح بهذا الشكل، فلما كلمنى الدكتور عزيز صحيح كان واخذ ٣ مليون كرصيد مبدئى، ولما اتكلم فى نفس اليوم أو تانى يوم أخذ ٦ مليون. وبرضه لا الـ ٣ ولا الـ ٦ تدل على تعبير حقيقى إن احنا نمشى خطة فى البلد؛ لأن إذا كنا عايزين عملية تمويل مضبوطة يبقى القطاعات لازم تساعدنا فى معرفة التمويل على مدار السنة شكله إيه. لأن يعنى زى ما بنتكلم على الواجبات لازم نتكلم على الحقوق أيضا؛ بمعنى إن النهارده الضرائب ما بتحصلش، و ٣٦ مليون جنيه ديون على القطاع العام لمصلحة الضرائب.. يعنى العملية التمويلية أخذ وعطا.

عبد الناصر: نفتح مش نعطل الدنيا! نفتح المواضيع ونشوف المواضيع؛ لأن دلوقتى السنة اللي فاتت مافيش نسبة تنمية، السنة اللي قبلها مافيش نسبة تنمية! هنيجي السنة دي مافيش تنمية؟! لازم هنشغل الناس وإلا يعنى هنتحط فى مأزق!

حجازى: الدكتور عزيز كلمنى فيما يتعلق بالـ ٣ مليون، وقلت له: إن المذكرة اللي جت لنا درسناها وده اللي نسمح به فى حدود البيانات اللي وصلتنا، إنما علشان نصرف الـ ٧٢ مليون لازم ندرس الـ ٧٢ مليون على مدار السنة خصوصا وإن السنة دي مديين تمويل ذاتى من نفس القطاع.. يعنى مش هناخد وندى. أولا: جميع الأموال الموجودة فى القطاع نفسه لازم نستخدمها أولا، وبعدين بنديله اعتمادات حسب التطور بتاع المشروعات فى خلال السنة. يعنى أنا مش متصور خطة بـ ٣١٢ هاجى أصرف فى شهر ١٠٠ مليون.. ما بيحصلش! بمعنى هذا قلت له: الى أن ندرس بناخد ٧٢ على ٢ أو ٦ مليون. وفى نفس اليوم إدينا له ترخيص بالصرف فى حدود ٦ مليون.

صدقى: لو سمحت.. هو الواقع إنه الكلام اللي أنا قلته كان مضى أكثر من شهرين من السنة، من المعدل الوارد للاستثمارات كان مفروض ناخذ ١٢ مليون، ثم إحنا كنا فى نص الشهر اللي بعده كان كل اللي وصل ٣ مليون!

نتيجة لهذا - وأغلب الخطة عبارة عن استكمال مشروعات - الشركات اللي بتنفذ.. نفس شركات المقاولات سابت الشغل ومشيت لأنها لما الشركات ما بتاخذش مستحقات بتوقف العمل. فأنا برضه كلمت الدكتور عبد العزيز حجازى، وأنا برضه قلت الآتى: إذا كنا بنتكلم عن إصلاح مالى واقتصادى فليكن.. نضع الخطوات اللي احنا عايزينها، لكن الى أن نقرر أوضاع معينة مانوقفش الدنيا ونقول نستنى أما نشوف المواقف المالية للشركات!

سرى للغاية

يعنى الدكتور عبد العزيز حجازى فى كلامه معايا، ما أنا لازم أعرف المواقف المالية بتاعة الشركات قبل ما أدى. أنا بقول: فيه ميزانية بننفذ الميزانية، وبعدين ده كله قطاع عام.. هايروح فين؟! لكن مش معقول أبدا أقول لأ.. أستنى وأوقف الدنيا كلها لغاية ما أدرس المواقف المالية لشركات القطاع العام!

النقطة الثانية: إنه نتيجة لهذه الأعمال إن فيه ارتباطات دورية، يعنى الدكتور عبد العزيز حجازى أثار موضوع الحديد والصلب؛ هل إحنا هانفذ مجمع الحديد والصلب ولأ مش هانفذه؟ وبيقول: إحنا عايزين نشوف الموضوع!

فالحقيقة أنا مسؤل، ولما سيادتك بتيجى آخر السنة وتحاسبنى وتقول لى: إنت مانفذتش الخطة ومانفذتش الأهداف اللي عملتها؛ هنخش فى إن الخزانة ماديتيش واللجنة الاقتصادية ماديتيش.. مش ممكن يعنى!

فأنا بقول: طالما إن هناك قانون للميزانية بننفذها، وبعدين عندما تتم أى دراسة ما ونوضع وضع ما والدولة تقره هنلتزم به من يوم إقراره، لكن مش معقول الدراسة - وقد تأخذ شهور أو سنين - نوقف الدنيا كلها لما نشوف! وبعدين كمان خصوصا وأن هذه المشاريع فى التنفيذ؛ يعنى النهارده لسه كان عندى رئيس مؤسسة الثروة المعدنية، قال لى: دلوقتى مشروع الدرفلة المقاولين نفسهم مستحقاتهم مش قادرين ندفعها!

الحقيقة يافندم الوضع.. الخطة مش ماشية!

وبعدين بدى أقول حاجة: برغم الكلام عن الأوضاع المالية للشركات أو غيره، طب مانشوف هل القطاعات حققت أهداف ولأ؟! وأنا بعث النهارده للدكتور سيد جاب الله تقرير المتابعة؛ يعنى مثلا قطاع الصناعة حقق الأهداف فى الإنتاج وزاد عليها وفى التصدير ماشيين؛ فما نجيش بقى نوقف القطاع بدعوى أما نشوف المواقف المالية ونشوف..

لنا ٧٢ مليون فى الميزانية يبقى ناخذ بواقع ٦ مليون كل شهر. الدكتور عبد العزيز بعث لى ٦ أنا كنت منتظر بيعت لى ١٢ لأن فات ٣ شهور؛ يعنى بالـ ٦ نبقى خدنا ٩ والمفروض إحنا استحقينا ١٨!

عبد الناصر: أيوه يا أخ جاب الله.

جاب الله: بالنسبة للخطة وإمكانية تنفيذها اللي سيادتك بتستفسر عنها، هى الموارد الحقيقية قائمة لتنفيذ الخطة وتكفى لتحقيق الأهداف.

سرى للغاية

النقطة الثانية: إنه بسبب نواحي إجرائية التنفيذ بطيء، وبطء التنفيذ منعكس فى مستوى أسعار السلع الأساسية لعملية الاستثمار؛ القمح، الذرة، الفول، الرز؛ تستهلك بأسعار مش بس بأقل من التسعيرة.. حوالى بنصف ما كانت عليه من سنة.

عبد الناصر: إيه.. مش فاهم أنا والله!

جاب الله: هى أسعار الحاصلات الرئيسية اللى هى أساسية فى عملية الاستثمار، هذه الأسعار اتخفضت أقل من التسعيرة؛ فتستهلك هذه المحاصيل بمستوى أسعار تبلغ نص الأسعار السائدة فى السنين اللى فاتت. دلالة هبوط الأسعار هو انكماش فى الطلب، ودلالة انكماش الطلب دلالة على أن الإنفاق على الاستثمار مش كافي. فالموارد موجودة، إنما بسبب الإجراءات فى الإنفاق على الاستثمار مش كافي وبينعكس على الأسعار؛ بمعنى إن الناتج ينساب الى الاستهلاك بنصف الأسعار الحقيقية بتاعته. والأمر يتطلب إننا ندفع أكثر فى تنفيذ الخطة والاستثمارات المقررة فيها، خصوصا وأن مواردها المالية متوفرة وكافية لتنفيذها.

سليمان: هو الواقع الموضوع اللى أثير النهارده جديد على خالص يعنى! إنما معلوماتى أنا عن نقطة واحدة خاصة بميزانية النقد الأجنبى. كنا اتفقنا هنا فى المجلس نخفض ميزانيات الوزارات ٢٠٪، ورجينا الوزارات إنها تبعت لنا التوزيع بتاع الميزانية المخفضة للنقد الأجنبى المطلوب حتى يمكن إن وزارة الاقتصاد تنفذ به. للأسف فيما عدد قليل جدا من الوزارات، الباقي برضه طالبين استثمارات من غير الـ ٢٠٪.. يعنى استثمارات بالكامل.

فطبعا اتفقت مع الدكتور سيد، إن الوزارة اللى يصله منها توزيع المبلغ المخفض فورا يوافق لها على ميزانية النقد الأجنبى للسنة. ويمكن الأخ حسن يحب يضيف حاجة.

زكى: الحقيقة أنا مش شايف فيه تعطيل من الناحية المعانة، إحنا اتفقنا على الخطة واتفقنا على النقد المحلى والنقد الأجنبى، إذا كان فيه بعض مشاكل بالنسبة للنقد المحلى ممكن ترجع الى أن إجراءات التمويل أو التحصيل أو بعض التشريعات اللى كانت مفروض تصدر علشان نحصل فيها على فرق العجز اللى فى الميزانية، إتأخرت.

فيمكن دى خلت الأخ عزيز بدل ما ياخذ ١٠ أخذ ٦، لكن مؤكد فى خلال شهر - شهرين هيقدر يلحق نفسه.

سرى للغاية

إحنا كنا قلنا: إن فيه عجز ٢٠٪ صحيح، وقلنا: نخصمه من كل الوزارات. كان الأخ عزيز اتصل بى وقال لى: إن دلوقتى الحصة من الميزانية النقدية بتاعته جزئين.. جزء خاص بالواردات العادية وجزء بالواردات الاستثمارية.

فقال: إن أنا مجموع الاتنين لن أغيره، وعلى ذلك اللى أنا هاوفره لك من الميزانية العادية نزوده على الميزانية الاستثمارية وبالتالي ماتشيلش الـ ٢٠٪. أنا وافقت على أساس إن العبرة بالنسبة لى هو مقدار النقد الأجنبى اللى هياخده قطاع الصناعة، وطالما إنه هيكون الجزء الاستثمارى زى ما تعودنا دائما إنه الجزء المدفوع مقدم اللى هو ١٠ - ٢٠٪ والباقى يسدد على سنوات مش على سنتين - ثلاثة إلا فى الآلات الصغيرة الباقى على ٧ - ١٠ سنوات.
أنا متصور إنه أهم مشروعات كانت البترول، أنا مش شايف..

صدقى: البترول النقص اللى كان مطلوب الـ ٢٠٪ كان نصه من قطاع البترول.. استثمارات البترول، فالواقع إن فيه تأشيريات جت فى الميزانية إحنا قربناها بعد ماصدرت؛ التأشيريات هى اللى كلبشت، كل حاجة لازم نرجع الى اللجنة الاقتصادية! الحقيقة العملية دى أصبحت معقدة!

يعنى النهارده علشان أمشى أى حاجة لازم أكلم السيد وزير التخطيط وأخذ موافقة، ثم وزير الخزانة وأخذ موافقة، ثم وزير الاقتصاد وأخذ موافقة، وبعد ما آخذ الثلاثة يقولوا: لأ.. ده فيه حاجة اسمها لجنة رباعية يبقى يتعرض عليها الموضوع!

أنا بقول: إن احنا فى وسط تنفيذ، وإذا كنا فى حاجة الى دفع التنفيذ فى الظروف العادية فنحن أحوج الى دفع التنفيذ فى الظروف الحالية.

إحنا النهارده وضعنا عقبات فى كل خطوة! بحيث إنه أنا غير قادر على تنفيذ الخطة. يعنى أنا بكلم سيادتكم دلوقتى الصراحة؛ لأنه فيه التزام فيه خطة وفيه مشروعات قدمت بأسمائها واعتماداتها ثم اعتمدت مبالغها فى الميزانية. إذا كان فيه موضوع خاص بالخزانة والسيد وزير الخزانة اتفق معايا إن يدينا المبالغ، ليه نعطله؟!

زكى: الأخ صدقى سليمان قال: مانعرضوش على اللجنة، قال: اللى وافقتوا عليه يمشى.

صدقى: أنا بتكلم على الإجراء اللى متبع الى الآن، يعنى إحنا مضى من السنة ٣ أشهر الآن، الخطة معطلة تماما! وإذا كانت حتى بالنسبة لمشروعات جديدة، ده المشروعات اللى فى التنفيذ معطلة، شركات محملة بأعباء مالية ونيجى نقول لها: هانديكى استثمارات وماشية فى تنفيذ الخطة، بنيجى فى أول السنة نطلب استثمارات.. مافيش!

سرى للغاية

مجمع الحديد والصلب، الأخ على زين العابدين بعث لى جواب بال ١,٥ مليون جنيه اللي واردة فى الميزانية علشان يمشى فى مشروعات النقل. أنا مارديتش عليه لأن هاجيب الـ ٥ مليون منين؟! هى واردة فى الميزانية، إذا كان المشروع الأصلي اللي إنت هتخدمه المشروع ماخذناش الاعتمادات بتاعته هاديلك إزاي؟!

والخطة مش ماشية! وأنا أرى إن احنا يافندم إذا سمحت إن احنا نعيد النظر فى الأوضاع اللي احنا حطيناها؛ إحنا حاطين فى كل خطوة عقدة! لازم نرجع لـ ٢٠ جهة علشان ناخذ موافقة! أنا بقول: الميزانية اعتمدت، إذا اعتمدت لتنفيذ وضع معين، هناك مسؤوليات ويجب أن كل وزير يتحمل هذه المسؤولية. إنا هاجى وأحاسب آخر السنة إن الخطة ماتعملتش، وساعتها هايبتسى إن الخزانة ماإديتتش أو اللجنة الاقتصادية أو كذا! ويقال ليه الصناعة ماحققتش أهدافها؟!

حجازى: الحقيقة الكلام اللي بيقوله الدكتور عزيز، كلام كبير قوى يافندم! أنا لى تعليق: إنه اللجنة الاقتصادية تناقش هذا الكلام لسبب بسيط جدا إن الخزانة ماعطلتش ولا إجراء.

وهذا الكلام لم يحدث إلا فى خلال الـ ١٠ أيام الأخيرة - قبل المؤتمر بكام يوم - والدكتور عزيز لما عرض الفكرة الخاصة بالتمويل المذكرة اللي جت وأنا أشرت عليها شخصيا دون مناقشتها؛ لأن بصراحة مافيش خطة تمويلية فى البلد على مدار السنة. فيه ميزانية أيوه.. الميزانية ٢٠٠٠ مليون جنيه، إنما علشان أنفذ الميزانية على مدار السنة ده تمويل وجهاز مصرفى وبنك وفوايد يعنى مسألة..

يعنى أنا أقدر أقول: كل واحد يصرف طب وبعدين هانروح للبنك؟! اللي واخد ١٠٠ مليون، اللي واخد ٥٠ مليون هايروح يصرف ٥٠ - ٦٠ بدون أى ضوابط؟! لازم يبقى فيه ضوابط.

بالنسبة للحكومة معروفة بندى ١ على ١٢ من الاعتمادات؛ لأن النشاط فى الحكومة منتظم على مدار السنة، وبالتالي بنقول: نسبة ١ على ١٢ هى النسبة المعقولة وبالتالي أى خروج على هذه القاعدة بنبت فيه مباشرة، لو فيه أى طارئ بالنسبة للحكومة بنبت فيه، وبالتالي نتصرف على ضوء هذه الطوارئ فى الحكومة فمافيش مشكلة.

بالنسبة للقطاعات الاقتصادية النهارده الخطة كبيرة مهياش محدودة.

ثانيا: الأعباء، عملية الإنفاق بتاع العملة المحلية ماينتتمش فى يوم وليلة، بتتم على مدار السنة فى خلال ١٢ شهر. أنا سألت.. هل فيه خطط تمويلية على مدار السنة بالنسبة للقطاع الاقتصادى فى الخزانة فى السنين السابقة؟! لأ! دى علشان ندرس عملوا محاولة قبل كده وفشلت! وبالتالي مافيش خطة تمويلية على مدار الـ ١٢ شهر.

سرى للغاية

إذاً الخزنة علشان تدى ترخيص بالصرف لازم يبقى فيه دراسة. أنا طالب دراسة على مستوى القطاعات، يصح فيه مواسم الإنفاق فيها بيزيد؛ يعنى مش ضرورى أبدا إن أنا أدى للصناعة ١٢ مليون كل شهر، يصح آجى فى شهر أدى ٣ مليون وفى شهر ١٢ مليون. قطاع تانى ممكن أديله مليون فى شهر ٥ فى شهر آخر. هذه الخطة التمويلية على مدار السنة غير موجودة ولم تكن موجودة؛ فكان النظام المتبع فى الخزنة تعنى بالطلبات الخاصة بالقطاعات أولاً بأول.

طبعا علشان ننظم هذه العملية، فلانم إعادة التنظيم ولانم جهاز يقدر يقوم بهذه العملية بحيث إن احنا نلبى الطلبات حسب المواسم؛ فيه شركة تصرف مبالغ كبيرة فى شهر وتقع فترة طويلة.

أنا مش شايف الخزنة عطلت أو حد طلب منها حاجة وعطلتها فيما يتعلق بالخطة سوى إن الدكتور عزيز كلمنى من ١٠ أيام وقال: إن الخزنة صرفت ٣ مليون، وإن ده ماينفعش عايزين تعيدوا النظر فى التمويل. وفى نفس اليوم اتصلت بالأخ حسن عباس زكى علشان العملة الأجنبية وأشوف التمويل ماشى إزاي، وفى نفس اليوم أعدنا النظر فى الطلبات بتاعته وإديناه ٦ مليون، ولم يحدث إطلاقاً إن أى حد من السادة الوزراء فيما يتعلق بتنفيذ الخطة، فيما عدا هذه الحادثة العارضة اللى هى حديث تليفونى دار بينى وبين الأخ عزيز.

أما كونى أنا أطلب دراسة اقتصادية لمشروعات، أنا قايل ويقول ولازلت بقول: فيه مشروعات محسوبة فى الميزانية أنا الحقيقة لا أعلم عنها شئ!

فمش عيب إن أنا أسأل عن دراسة اقتصادية إطلاقاً، كون الميزانية اتخط فيها تأشيرة إن المشروعات الجديدة تعرض على اللجنة الاقتصادية، أنا لم أضعها وحدى ولكن وضعتها اللجنة الاقتصادية؛ كل هذه المسائل واضحة $1+1=2$.

أما أنا أدى ترخيص بالصرف ١ على ١٢ من الميزانية، إجراء لا يستقيم مع نشاط اقتصادى يتغير من شهر لآخر. فالطلبات اللى بتيجى بنبت فيها والسادة الوزراء موجودين، مين بعت مثلاً طلب اعتمادات ولا خدش؟! ولا حد.

ده الموقف يعنى، إذا كان الدكتور عزيز عنده مشكلة اللجنة موجودة يعرض المشكلة وندرسها بالتفصيل. وأنا طلبت فعلاً من الصناعة.. الصناعة ٧٢ مليون، ٧٢ مليون هاديله ٦ مليون كل شهر؟ ده يصح يؤثر على التمويل العام.

الحاجة الثانية: الحصيلة النهارده بالنسبة للإيرادات، عندى مبالغ ضخمة فى القطاع العام بأحاول أحصلها. بعت للسادة الوزراء كل واحد جواب: أرجوكم تدفعوا، تخلوا الشركات تدفع الضريبة المستحقة عليها من العام الماضى لأن أنا عندى ٣٧ مليون عجز!

سرى للغاية

فى اللجنة الاقتصادية، فى اجتماعات متتالية لمتابعة المشروعات؛ لأن لازال عندى ٦ مليون أو ١٠ مليون عجز، عرضت مشروعات متتالية مامشيناش منها غير ٤ - ٥ مليون.
يعنى أنا باتحرك.

عبد الناصر: أنا باتكلم.. بسأل، لأن أنا طبعاً..

حجازى: أنا مش حاسس إن فيه عطة يافندم.

عبد الناصر: يعنى أرجو، دائماً هناك اتجاهات لتتويم الخطة لتوفير تحت أى عنوان من العناوين أو أى سبب من الأسباب، وبالعقل الباطن يادكتور حجازى بيحصل هذا العمل بالنسبة لوزارة الخزانة ووزارة الاقتصاد..
يعنى بالعقل الباطن من غير ماتدرى يعنى! (ضحك)

حجازى: لا.. مش عندى، أنا حريص يافندم على إن المسائل تنفذ. أنا باتابع دلوقتى يافندم فى التمويل إيراد ومصروفات بند لأن أنا نجاحى فى الميزانية هو التحصيل. أنا فعلاً بأعيد تنظيم الوزارة لأن فعلاً قطاع الأعمال بالذات لازم ياخذ حرية، ده أنا باعمل توعية.

عبد الناصر: ماهو موضوع الإصلاح الاقتصادى ماجالناش، أنا بعتر لسه محصلش إصلاح اقتصادى. المذكرة اللى إنت قدمتها ووافقنا عليها دى.. دى كانت موافقة علشان تسهل لك الميزانية.

حجازى: موجود يافندم النهارده دراسات وأبحاث بندرسها مع القطاعات لأن أنا مش عايز..

عبد الناصر: يبقى المطلوب.. إن الخطة تتنفذ وفى آخر السنة تكون الخطة متنفذة وتحقق تنمية ٥٪.

حجازى: أنا مستعد أتحمّل الكلام اللى بقوله، اللى عنده معوقات من الخزانة بيقول لى.

مراد: والله فيه حاجة عايز أقولها بالنسبة للتأثيرات فى الميزانية: إن فيه يمكن دلوقتى جت على لسان الأخ الدكتور حجازى إن فيه خطة تصنيع فيها مشروعات يظهر إن مافيش الاقتناع الكافى بأنها مدروسة اقتصادياً ولذلك فوتوا الميزانية - زى سيادتكم مابتقول - وبعدين قالوا: كل مشروع بييجى لنا نبقى ندرسه فى حينه.

سرى للغاية

ودلوقتى مثلا زى مجمع الحديد والصلب، فيه الآن كثير من الشك فى صلاحياته من الناحية الاقتصادية، وكتبت فى الصحف.

عبد الناصر: وهو رئيس وزارة إحنا موافقين عليه فى اللجنة التنفيذية العليا.. هو صدقى.

مراد: بس بيقلوا: إن فيه انطلاق وفيه خطة تنمية اقتصادية وإنتاجية للمصانع، ودلوقتى نتيجة وقف خطة التنمية فى الفترة اللي فاتت بقى إنتاجه أزيد بكثير من حاجة البلد، وعلشان نصرف الزيادة فى الإنتاج هيبقى غالى بالنسبة للخارج وفيه فائض فى السوق العالمى.

والكلام ده اتكتب فى الجرايد.. الأخبار والأهرام الاقتصادى من أخصائين وفيه ناس فنيين بيعارضوا دلوقتى، بيقلوا: إن الظروف دلوقتى اتغيرت ويجب إعادة النظر فى المشروع.

فمثل هذا بيوجد شك ساعات فى مدى هل ننطلق ولا ندرس؟ يمكن ده السبب الباطنى، مادام سيادتكم اتكلمت على العقل الباطن والاحساس النفسى! يعنى مافيش الإيمان القوى بأن هذه المشروعات عايزة الدفع القوى وكلنا نزق فيها؛ ولذلك هو كان يحسن باستمرار إن هذه المشروعات بيبقى لها دراسة اقتصادية، وكلنا - حتى اللي مننا مش فنيين - برضه بيقوا متابعين العملية وكلنا مؤمنين بها ونزق فى الموضوع.

فيمكن ده - لو أذنت لى سيادتكم - هو السبب الباطنى!

صدقى: أنا أحب أقول: إن الخطة اللي بننفذها النهارده هى ما تسمى بخطة الإنجاز، ووضعت فى الوقت اللي كان السيد صدقى سليمان رئيس الوزراء.

المشروعات دى قتلت بحثا ودراسة فى وزارة الأخ زكريا محى الدين ثم فى وزارة الأخ صدقى سليمان، واستبعدت بعض مشروعات ووفق على بعض المشروعات.

مشروع الحديد والصلب - اللي سيادتكم بنقول عليه - فى وزارة الأخ زكريا محى الدين نوقش ودرس، ثم السيد وزير الصناعة فى ذلك الوقت هو اللي وضع البروتوكول وأمضاه مع الاتحاد السوفيتى ووافق عليه مجلس الوزراء فى ذلك الوقت، ثم أعيد الموافقة عليه فى وزارة السيد صدقى سليمان. أنا النهارده بانفذ مشروع فى التنفيذ فعلا.

الموضوع إن فيه تشكك فى اقتصاديات المشروعات ويجب أن تكون هناك دراسة اقتصادية.. ده مطلوب. مافيش مشروع اتعمل بدون دراسة اقتصادية، ولا يجوز أن نقول كأنه لم يكن هناك دراسة اقتصادية للمشروعات؛ لأن ده اتهام خطير جدا ومن غير المعقول أن الدولة على مدى عشر سنوات من التخطيط الصناعى تعتمد ١٠٠٠ مليون جنيه بدون أن تطمئن أن هناك دراسات!

سرى للغاية

أنا أحب أقول لسيادتكم واقعة: إن فى وقت من الأوقات قيل إن الدراسات مش كافية وطلبت الدراسات بالنسبة لمشروعين.. مشروع الألومنيوم ومشروع الحديد والصلب. فهئية التصنيع علشان تبعت كافة الدراسات، أجرت عربية كارو لأنها كانت فى أكثر من ٦ زكايب.. مجموعة الدراسات اللى اتعملت لهاذين المشروعين.

فمش معقول إن مشروعات هاتتكلف عشرات الملايين من غير دراسة إنما مسألة التشكك باستمرار! وأنا الحقيقة سمعت كلام إن المشروعات لازم تدرس ولازم نشوفها كأنه لم يكن هناك دراسة! قد يكون هناك خطأ فى الدراسة فى مشروع أو فى آخر ومافيش حد فى الدنيا منزّه، طبعا الفنيين بتوعنا هم اللى بيدرسوا ويبقروا.

لكن من حيث المبدأ أن هناك مشروعات أقرتها الدولة وسارت الى التنفيذ بدون دراسات اقتصادية.. ده قول غير حقيقى. أنا يؤسفى أن أقول يافندم: إن بعض ما كتب فى بعض الصحف أخذت بيانات من بعض دوائر رسمية! يعنى الحقيقة الحملة فى التشكك سارت الى درجة غير مقبولة. وبعدين أنا بقول النهارده بانفذ خطة الإنجاز التى لم أكن مشتركاً فيها!

يعنى أظن إن ما فيش حاجة! دفاع عن هذه المشروعات أنا مش بادافع عن نفسى فيها أكثر من إن أنا بانفذ خطة إنجاز أنا لم أقرها ولم أشارك فيها. لكن كمان لا يجوز إطلاقاً.. أنا مقتنع بما ورد بها من مشروعات وبأهمية عملية التصنيع وهى سياسة الدولة والدولة أعلنتها فى كل المناسبات، وأنت بنتائجها وبأحسن النتائج اللى كنا ننتظرها منها، وبعدين أقبل بإن العملية توقف!

كمبدأ.. المبدأ اللى النهارده هل هناك تنمية ولا ما فيش تنمية؟! الحقيقة إحنا النهارده بقى يجب أن نضع سياسة يالما هناك تنمية يالما ما فيش تنمية، ونقرر المبدأ ثم يلتزم كل مننا به.

ما مصلحتى فى إن احنا ننفذ مشروعات كثيرة أو قليلة إلا لأنى أعتقد أن هذا هو ما أقرته الدولة، وعلى التزام كوزير للصناعة أن أنفذ ما أقرته الدولة؟! إنما تبقى العملية أن هناك من لا يقتنع بهذا، إنه تتخذ الوسائل لإيقاف هذه العملية تحت ستار ندرس المشروعات! طب هذه المشروعات فى التنفيذ.. ده التعطيل النهارده فى تنفيذ ما هو فى التنفيذ، أنا أفهم إن احنا ندرس الجديد!

مشروع الحديد صُرف عليه حتى الآن ١٥ مليون جنيه، ده مش مشروع جديد واتعملت بروتوكولات والسيد وزير الصناعة فى ذلك الوقت راح الاتحاد السوفيتى ومضى أكثر من بروتوكول وصار فى التنفيذ؛ نبقى نلاقى كأن الموضوع لم يدرس!؟

عبد الناصر: لازم تاخذ استراحة شوية علشان تروق دمك! (ضحك)

سرى للغاية

صدقى: يافندم أنا اتعرضت فى الفترة اللي فاتت دى لعملية غريبة جدا..

عبد الناصر: روق دمك ياعزيز، الأخ مراد له الحق إنه يشك فى دراسة أى مشروع هو عايز يقتنع به.

صدقى: طب ما أنا بأشرح له إن كان فيه دراسة.

عبد الناصر: لأ.. ونقول له: إن الدراسة كذا وكذا وأى واحد الحقيقة له الحق أن يقول، لأنه إذا كان قرأ هذا الكلام فى جريدة الأخبار مثلا مش هو بس اللي يبقى شك، بيبقى الناس كلها شكت! هو الراجل له الحق يسأل ويقول لك: أنا باشك فى الدراسة الاقتصادية لهذا المشروع، وإنت مايقالكش الحق إنك تتتحقق!

صدقى: أنا مابتحمقش يافندم.

عبد الناصر: (ضحك) يعنى بنوضح بدون حمق!

صدقى: أصل الكلمة دى يافندم بتتردد دلوقتى فى كل اجتماع!

عبد الناصر: ماعلش.

صدقى: لما نبقى ندرس المشروعات! لما نظمنن الى اقتصادياتها! كأنه هناك خطأ جسيم وأن هناك حد يبحاول يخبى! دى خطة إنجاز وننفذها، وأغلب استثمارات هذا العام استكمال لمشروعات.

عبد الناصر: طب إنت قلت هذا الكلام ياعزيز، هانقله تانى ليه؟! (ضحك)

حجازى: هو فيه طلب بسيط من الأخ عزيز علشان يعنى نريحه لأن الصناعة تهمننا، الصناعة عندنا ١١٠، عايزين يافندم الدكتور عزيز يدينا خطة تمويل على مدار الـ ١٢ شهر وأنا التزم قدام المجلس بتدبيرها.

صدقى: خطة التمويل إنك تدينى ١ على ١٢ من الميزانية.

حجازى: لأ.. مش ممكن!

صدقى: أمال إيه؟

حجازى: لأن ده مش أساس علمى إن أنا أنفذ الخطة ١ على ١٢؛ أنا مابشتغلش بطريقة منتظمة طول السنة، أى واحد بيعمل مشروع وبينفذ مشروع بيشتغل وبعدين بيدفع مقدم.

يعنى عملية الإنفاق لازم لها طريقة معينة علشان أنظم موارد الدولة علشان أقدر أعطى كل القطاعات. سيادتك فيه ميزانية تقديرية من الناحية النقدية باخدها على مدار السنة، وأنا مستعد أعمل لها التمويل اللازم.

لأن سيادتك عندك ٣٧ مليون تمويل ذاتى و ٧٢ من الخزنة، ال ٧٢ من الخزنة فيها جزء سد عجز، وسد العجز مابيطهرش فى الشهور الأولى ده سد العجز يظهر فى الأشهر الأخيرة بالنسبة للقطاعات اللى فيها عجز.

فأنا بقول: سيادتك تدينا دراسة على ال ١٢ شهر وأنا مستعد إن أنا أعمل على تدبير هذه الموارد خلال ال ١٢ شهر.

عبد الناصر: إحنا مش عايزين تضارب، ولأ أرفع الجلسة وأجيب لكم ليمون؟! (ضحك)

أصوات: (ضحك)

شقىر: إسمح لى يافندم.. هى المشروعات لها ميزانية تقديرية موزعة على عدد من الأشهر، هو لو الطلب اللى الدكتور عبد العزيز حجازى بيطلبه؛ اللى هو يجمع خطة التمويل فى الميزانية التقديرية الموجودة لكل مشروع وتتجمع ونشوف هاتظهر إيه؟ لأن فى الخطة التقديرية أو الميزانية التقديرية السنوية لكل مشروع مربوط له إن الشهر هيتصرف كذا و.. الى آخره، لو الدكتور عزيز جمعها ووضع الميزانية التقديرية دى واتفق مع الدكتور عبد العزيز، بيدو لى هانقول الشهر ده ٥، الشهر ده ٧، الشهر ده ٩ بحسب تجميع الميزانيات التقديرية.

وهى المشكلة فى اعتقادى مهياش بالضخامة اللى باينة من النقاش يعنى.

سرى للغاية

عبد الناصر: على كل حال الهدف هو الخطة تمشى. تتفق مع الدكتور عبد العزيز على عملية التمويل، هو برضه كلامه صح مش معقول ٦ كل شهر!

صدقى: إسمح لى يافندم، هو الوضع بتاع الشركات إنها كُلفت بمشروعات على مدى السنين اللى فاتت على إن الدولة هاتديها من ميزانيتها استثمارات معينة. الدولة سنة بعد أخرى مايدتش الاستثمارات اللى كان المفروض تديها من الميزانية، فاضطرت الشركات إنها تكمل المشروعات بالافتراض من البنوك؛ فأصبح الشركات - من أنجح الشركات اللى عندنا - مدين بـ ١٠ - ١٢ مليون جنيه.

النهارده الميزانية الاستثمارية حتى مهياش لمقابلة الالتزامات شهر بشهر، بل لسداد دين مستحق من سنتين تلاتة. يعنى كلام الدكتور عبد العزيز لو إحنا ماشيين بـ system مضبوط من أول يوم، وهو يعلم المراكز المالية للشركات وأنا ذكرتها له قبل كده وهو وافقنى؛ إن الشركات النهارده هى كوحداث اقتصادية مش سليمة، هى حُملت بأعباء وقروض مالهاش ذنب فيها.. فأصبح هو ده الوضع.

لما بيبجى بالإضافة الى هذا أن مشروعات التنفيذ أيضا الاستثمارات اللى هى لازمة علشان ندفعها للمقاولين مابنتوفرش لديها؛ نقف. أنا أستشهد بالدكتور حسن مصطفى، برجع لشركات المقاولات وباشوف..

مصطفى: أنا موافق.

صدقى: ويشوف شركات القطاع العام مدينة لشركات المقاولات بكام؟ حتى البنوك لما النهارده بيروحوا يقترضوا بيرفضوا لأن الموقف المالى للشركات متعذر! فالموضوع مش كده.

حجازى: هو يافندم - لو سمحت لى - الكلام ده كله صح، وده ناتج من عدم وجود سياسة تمويلية سليمة تراكمت نتيجة لها ديون وقروض وأعباء فى الشركات. لما بيبقى عندى ٤٠٠ شركة، محدش متصور إننى فى ظرف شهرين أدرس ٤٠٠ شركة وليس لدى فى وزارة الخزانة جهاز! وأنا يمكن اتفقت مع الأخ سمير حلمى والسيد حسين الشافعى يعلم، بأن أنا بأوقف فحص الشركات المساهمة العامة من الناحية الضريبية وباحول الجهاز اللى عمال يراجع فى شركات مساهمة ويضيع وقته، إنه يدعها علشان خاطر نقدر نجابه عملية التمويل الخاص بالشركات.

فالدكتور عزيز عايزنى أحل حاجتين فى نفس الوقت! هى دى الصعوبة الحقيقية؛ التراكم بتاع السياسة المالية الخاطئة اللى تحملت بها الشركات فى خلال السنين اللى فاتت. شركات الأسمنت عمرها ماكانت بتخسر هاتخسر السنة دى لو سببناها بدون مانديها تمويل؛ لأن راحوا خدوا فلوس ومولوا بها شركات فى السودان وإدوا قروض وبالتالي الشركات عجزت النهارده مافيهاش سيولة!

سرى للغاية

أنا بادی مثال.. أنا باعترف بهذا، ولهذا أنا مش عاوز أمشى فى نفس الدراسة اللي كانت ماشية فى السنين اللي فاتت. من أجل هذا فعلا أنا باعمل دلوقتى اتفاق مع الجهاز المركزى إنه يشيل عنى من اللي بيقوم به الضرائب؛ علشان أحقق وأقدر أسحب جهاز مصلحة الضرائب أجرى به الدراسات اللي تخلىنى أصح هذه المراكز المالية؛ لأن فعلا الصناعة وشركات المقاولات بالذات فيه كثير من الشركات محملة بأعباء ضخمة. إحنا السنة دى حاولنا نعالج قطاعين.. قطاع السياحة وشركة الحديد والصلب فقط فى الميزانية لأنه لا كان عندى بيانات وحجم المشكلة مش قدامى.

فلو أنا أصح رؤوس أموال الشركات هاعوز مشروعات ضخمة، فنحطها حسب أولويات معينة. فالحقيقة فيه مشكلتين مش مشكلة واحدة يافندم.

صدقى: وده اللي أنا بقوله يافندم، الى أن تعمل هذه الدراسات مانوقش. يعنى بقول: هل هنفضل واقفين لغاية مانشوف الحالات كلها بتاع الشركات؟! بقول: طب مانمشى فى التنفيذ لأن دى أعباء وفى التنفيذ ومقاولين فى إيديهم عمل.

والدراسة - وأنا قلت الكلام ده للدكتور حجازى لما كلمته فى التليفون - قلت له: عندما نجد الحل اللي هانقره كسياسة يبقى نطبقه من وقتها، لكن دلوقتى ماقولش فى الماضى كان فيه system فى وزارة الخزانة خلا لى الموقف المالى للشركات.. أقوم أوقف الدنيا كلها لغاية ما أشوف الـ system وأدرسه وبعدين أبدى أدى! لأ.. بنمشى لأنه فيه حاجات متطلبات للتنفيذ. ولما بتبين الدراسة اللي هتعملها وزارة الخزانة وتقترح system معين والدولة توافق عليه، كلنا نلتزم به. هو ده بس الموضوع اللي بينى وبينه.

الشافعى: هو الحقيقة الموضوعين.. كل واحد وجهة نظره سليمة؛ الدكتور عزيز فعلا وهو عايز ينطلق فى التنفيذ بتاعه لازم يطمئن الى أن التمويل متوفر بحيث إنه مايقاش فيه عقبة فى التنفيذ.

وهنا فى الجلسة حصل اتفاق على إن الأساس اللي يتم به التمويل يمكن كان فيه نقطة خلاف بالنسبة لبعض المشروعات محملة بأعباء، واتفق عليها فى الجلسة اللي كنا حاضرينها هنا.

بالنسبة للخزانة، يعنى إذا مكانش فيه خطة تمويل هتخلص الشركات من الظروف اللي كانت موجودة فيها، فعلا هبقى باستمرار داخلين إحنا فى حلقة مفرغة بالنسبة لأن سيولة الأموال غير قادرة على مقابلة التمويل الحقيقى اللي تم الاتفاق عليه بالنسبة للأساس.. التوزيع اللي حصل.

ويتهيا لى علاوة على أن الخطة هنقر إذا مكانتش خطة التمويل، خطة الائتمان هتكون قادرة على إنها تبقى قائمة بذاتها؛ بحيث إنها ماتخليش أى قطاع حاسس بإنه متوقف على عملية التمويل، فعلا المشروعات هتيجى تصطدم بالتنفيذ الفعلى.

سرى للغاية

والشركات كانت ارتبطت بعملية مركزية أكثر مما ينبغي، خلت فيه جزء من المسؤولية عن عدم القدرة على الحركة لربط ده مع ده وده مع ده؛ فأول ما حلقة بتقف بترد على بقية الحلقات. واللى أنا أقصده.. بقول: إن الدكتور حجازى يعنى اللى هو ببسعى اليه النهارده هو عايز يخلى هذه الشركات فى دور حركة واعتماد على النفس؛ بحيث إن التمويل يكون تمويل حقيقى مش تمويل من الناحية النظرية. ويتهىألى العملية دى هتاخذ بعض الوقت، ويجب الجهتين يصبروا على بعض شوية ويقدروا الظروف الحقيقية للموضوع.

عبد الناصر: موضوع أخير.. قرارات المؤتمر القومى وأنا تعهدت بتنفيذها. كل وزارة من الوزارات تشوف إيه اللى يخصها من قرارات المؤتمر القومى للاتحاد الاشتراكى، وتعرض أيضا على اللجنة اللى هيرأسها السيد حسين الشافعى؛ يبقى عندنا قرارات ٣٠ مارس، وفى نفس الوقت قرارات المؤتمر القومى للاتحاد الاشتراكى.